

Per in GEA a la revisiun da la lescha d'asil

■ **(cp) Las directuras ed ils directurs da giustia e polizia dals chantuns da la Svizra orientala (CDCGP-ost) sustegnan la revisiun da la lescha d'asil che vegn en votaziun ils 5 da zercladur 2016.** Sche las proceduras d'asil vegnan realisadas pli svelte che fin uss e però tut-tina en moda legalmain gista e correcta, profiteschan tut las parts participadas da quai: en emprima lingia ils chantuns e las vischnancas, la confederaziun e la finala er las requirentas ed ils requirents d'asil.

La collocaziun da requirentas e requirents d'asil è ina gronda sfida per ils chantuns e las vischnancas. Cun la revisiun da la lescha d'asil ch'il parlament federal ha deliberà ils 25 da settember 2015 e cunter la quala è vegnì fatg in referendum, duai il sector d'asil vegnir structurà da

nov. 60 pertschient da las proceduras d'asil duain vegnir terminadas cun vigur legala en centers da la confederaziun; sin ils chantuns e sin las vischnancas duain vegnir repartids mo pli quels 40 pertschient da las requirentas e dals requirents d'asil cun dumondas che pretendan scleriments pli detagliads. L'evaluaziun dal manaschi da test a Turitg ha mussà che las proceduras pon effectivamain vegnir acceleradas, senza che la protecziun giuridica u la qualitat da las decisiuns patissan da quai.

La conferenza da las directuras e dals directurs chantunals da giustia e polizia da la Svizra orientala, che cumpiglia ils chantuns Appenzell Dador, Appenzell Dadens, Glaruna, Grischun, Schaffusa, Son Gagl, Turgovia e Turitg, su-

stegna unanimamain questa revisiun da la lescha d'asil. Ella recumonda a las votantas ed als votants d'acceptar il project da votaziun e da votar cun persvasiun GEA ils 5 da zercladur 2016. Ella na s'empermetta da l'acceleraziun da las proceduras e da l'execuziun consequenta da las speditas numnadamain betg mo in signal vers anora, mabain correspondentamain er respargns da custs en connex cun la collocaziun, cun l'assistenza e cun l'integraziun da las requirentas e dals requirents d'asil. La clera cunfinaziun da la cumpetenzza tranter la confederaziun ed ils chantuns vegn dal rest er a garantir ch'i possa er effectivamain vegnir concedida la protecziun necessaria a las personas che bagegnan protecziun.